

INUIT ATAQATIGIIT

INATSISARTUNI



Nuuk, 12. maj 2013

Inatsisartut Suleriaasianni § 37 naapertorlugu Naalakkersuisunut imaattunik apeqquteqaateqarpugut.

Apeqqutit:

- 1) Ilumoorpa Kalaallit Nunaanni uranimik piaanermi kingunerisassat ersarisarneqarnissaannut suliaqartumik qallunaanik kalaallinillu ilaasortalimmik suleqatigiisitaliortoqarsimasoq?
- 2) Tamanna ilumoorpat suleqatigiissitami kikkut ilaatinneqarpat aammalu suleqatigiissitap suliaminik qaqugu naammassinninnissaanik Naalakkersuisut naatsorsuuteqarpat?
- 3) Suleqatigiissitap suliani naammassippagu Naalakkersuisut inerneranik saqqummiussissamaarpat?
- 4) Uranimik piasoqanngivinnissaata atorunnaarsinneqarnissaanut Naalakkersuisut julip qiteqqunnerani pilersaarummik saqqummiussinissamut suli pilersaarnerlutik, tassa Naalakkersuisooqatigiit atuutiernerannit ullut 100-t qaangiunnerini?

(Inatsisartuni ilaasortat Naaja H. Nathanielsen, Hans Aronsen, Maliina Abelsen aamma Sara Olsvig)

Tunggavilersuut:

Inuit Ataqatigiinniit inuiaqatigiinnut Inatsisartunullu matoqqasumik pissuseqarluni suleriaaseq akuerisinnaangilarput. Taamatullu Inatsisartunut ilaasortat aatsaat Danmark-iliaqqaarlutik Kalaallit Nunaannut tunngatillugu uranimut tunngasunik paasissutissanik pissarsisassappata akuerisinnaangilluinnarparput. Tamanna Aatsitassanut Aningaasaqarnermullu Ataatsimiititaliat, Folketingip Kalaallit Nunaannut tunngasutigit Aningaasaqarnermullu Ataatsimiititaliaannik sapaatip akunnerani kingullermi ataatsimeeqateqarneranni pivoq.

Ataatsimiinnermi ilasseqatigiinnissaq politikkikkullu pisunut pingaaruteqartunut paasissutisseeqatigiinnissaq siunertarineqarpoq, danskillu tungaanniit uranisiunngilluinnarnissap atorunnaarsinneqarnissaanut taamatullu mineralinik radioaktiviusunik piaanernut tunngasunik apeqquteqartoqarpoq.

Naalakkersuisut julip qeqqani uranimik piaanissap naatsorsuutigineqartup kingunissaanut tunngasunik annertunerusunik paasissutissiuumaarlutik ilisimatitsissutigisimavaat. Peqatigitillugulu ukiarmi Inatsisartut TAMARMIULLUTIK isumaqatigiillutik arlaannaannulluunniit atuumassuteqanngitsunit uranisiornissamut atatillugu nalunaarusiarititaata avammut saqqummiussinissaa Naalakkersuisut akuersissutigisimanngilaat. Naalakkersuisut suleqatigiissitap danskinik kalaallinillu ilaasortallip aatsaat naammassereerneratigit nalunaarusiamik saqqummiinissartik aalajangiussimavaat. Paasisagut naapertorlugit suleqatigiissitaq danskinik kalaallinillu ilaasortalik taamatuttaaq uranisiornermi kingunerisisassaanik paasiniaavoq.

Paasinarporli danskit Folketingianni ilaasortat ilisimatinneqarsimasut suleqatigiissitap danskinik kalaallinillu ilaasortallip aatsaat siusinnerpaamik ukiamut suliani naammassisinnaagaa. Paasisaq Nunanut Allanut Ministeriaqarfimmeersutut oqaatigineqarpoq. Aamma paasitinneqarpugut kinguartitsineq tamanna kalaalliniit kissaatigineqarsimasoq. Paasisap tamatuma

itisiliiffigineqarnissaa kissaatigivarput, tassami pilersaarutit Naalakkersuisuniit pisimasagut allannguuteqarsimapput.

Paasissutissaq tamanna eqquuppat aatsaat Danmarkiliaqqaarluta danskillu folketingii pulaaqqaarlugit paasitineqarnissarput paasiuminaatsipparput. Uggornartuuvoq danskit folketingimi ilaasortaata Kalaallit Nunaannut tunngasunik Inatsisartuni ilaasortaniit anner-tunerusunik paasissutissinneqartassappata. Pingaartumillu uggornarpoq uranimut atatillugu §37 naapertorlugu uranimut tunngasunik apeqquteqarnitsinni Naalakkersuisut tamanna ilanngullugu paasissutissiissutigisinnaagaluarmissuk imaluunniit Inuutissarsionermut Aatsitassanullu Naalakkersuisup tusagassiortunut katersortitsinermini 21. maj 2013-mi pisumi eqqaasinnaasimagaluarmagu.

Ammanerusumik ingerlatsinissaq piumasareqqissavarput, minnerpaamillu kalaallit politikeriisa Nunatsinnut tunngasutigut danskit folketingimi ilaasortaataatulli paasisaqartarnissaat piumasaralutigu. Taamatuttaaq inatsisiliornermut innuttaasullu peqataatinneqarnissaannut tunngatillugu kinguartitsinerup kingunerisassaanik Naalakkersuisut ilisimatitsissasut piumasaraarput.

Apeqqutit tamakkerlugit ullut qulit qaangiutinnginnerini akineqarnissaannik kissaateqarpugut.